

Ọkwukwo izi
Ele Hiburu
Nhne gbasiri ọkwukwo izi ka

Ọkwukwo izi Ele Hiburu bu ke be gbaznennu ele Karaisi ele be neemegidne, ele zi nu ogwnu nu be jaaghasa okwnata mkpoma nu Karaisi. Nye gbaru okwukwo ka naakanu be nu Jizosi Karaisi bu ezi oyiyi Chiokike n'iwuru a. O neegesi nhne ka, ke mbom, Jizosi bu Nnwọ Chiokike ke zi okwnukokwnu, nye muhiaru obno nsni hite n'awhnwhnu o gawheru. Lele Nnwọ Chiokike, Jizosi kakwo kpakara ele owhnurninya ke Tesitamenti Oknani, ma ele enine izi, ma Mozizi n'iwuru a. Ke ebo, Chiokike karu nu Jizosi bu nye ariohna, nye obula ke kweru nu ya, jeenwehia oznohia nu mmehie.

Nye gbaru okwukwo izi ka kwuru oka gbasiri ele dikne ke okwnata ovu, ele gwuzoru kwem du n'enu. Be lekwasiri Jizosi anya, nu ruwhnu awhnwhnu nu okpagbu be kpagburu be. O jiri odo aka nu nsni nu ezni mesni okwukwo izi a.

Nhne zi n'okwukwo izi ka

Karaisi bu oyiyi Chiokike zuru ozu (1:1-3)

Karaisi kakwo ele enine izi (1:4--2:18)

Karaisi kakwo Mozizi nu Josua (3:1--4:13)

Karaisi bu nye risi ariohna kakwo (4:14--7:28)

Ogba-njo-ehni **Karaisi** kakwo (8:1--9:22)

Ariohna **Karaisi** kakwo (9:23--10:39)

Okwnata mkpoma bu risi nhne (11:1--12:29)

Mee nhne joso Chiokike n'onu (13:1-17)

Okpukpe nu oka ipne-aznu (13:18-25)

Nnwọ a kakwo
ele ọwhnurninya

¹ N'ige wheru ewhe, Chiokike kwunnu ele nda aị ọknani ọka agịda ige hite n'ọnu ele ọwhnurninya n'apna zị ichne ichne. ² Kọvu kịtna, n'ọbochi ipne-aznụ ka, o kwunnu aị ọka hite n'ọnu Nnwọ a Jizọsi, bụ nye ọ họhiaru ma ọ bụru nye jeeri kpakara mkpe, nye o hiri n'aka a kpụ ọwa. ³ O nwernu igwugwu Nda a. Nnwọ wam bụ nhne Nda a bụ. O ji ikwu-ọnu a ke nwernu iknernema jigidne kpakara nhne. O jiri aka a snụsnama mmehie ọwa. Nga o mekworu ka, ọ daziri ẹli n'akarikwnunga Chiokike n'oligwe, nye kakwo kpakara nhne n'olu.

Nnwọ Chiokike kakwo
ele enine izi

⁴ Nnwọ wam kakwo ele enine izi lele kpa rẹwhna a “Nnwọ,” ke Chiokike nyernu a kakwo rẹwhna be.

⁵ Kwnornu nụ ọ zá enine izi ọbula ke Chiokike kannụ, “Ji bụ Nnwọ m.

M ghọlam Nda ị tna.”

Mọbu, ọ zị masị enine izi ke Chiokike kannụ,

“M jọoburunu ị Nda,
ị jọoburu Nnwọ m.”

⁶ Nga Chiokike neeziya Nnwọ a nụ rime ọwa, ọ kaa, “Kpakara ele enine izi Chiokike kpọnu a risi ẹli.”

⁷ Ka bụ nhne Chiokike kwuru gbasịri ele enine izi, “Chiokike mernu ele enine izi a lele ruwhere,
ele izi a lele bẹkwnu neerne erne.”

⁸ Kọvu nhne gbasịri Nnwọ wam, Chiokike karụ, “Chiokike, ngadna eze i jaazị tim tọm,
Mkpara ẹli-eze i bụ ikpe zị snam.

⁹ Ị whnurnu nhne ọma n'anya, sno nhne ojo irno,
kam kpayarụ, Chiokike, bụ Chiokike i teru i mọno ovu
ọso n'ọnu,

bịta ị nụ hne kakwo kpakara ele ibne i.”

¹⁰ Ọ kaa,

“Jị Jihova, ị turu ntụ-ẹli owa hite nụ mbom.

I ji aka ị lawuru kpụ oligwe.

¹¹ Kpakara be joowhu, kọvu ị jaazi ọkwonukokwnu.

Be jaaka bụka lele iwo.

¹² Ị jaapịakota be lele iwo olu,

be jaagbanwo be lele ikpe,

kọvu ị zị kpa ị zị nụ mbom,

onu ọgwunugwnu awha ị jéebi ebi.”

¹³ Ọ zá enine izi ọbula ke Chiokike kannụ,

“Daziri ẹli n'akarikwnunga m

tem dụ nga me jaabịta ele irno i

lele nhne ị jootukwasi ọchi ị lawuru.”

¹⁴ Ele enine izi, kpakara be bụo ele o ziyaru o yinu ele jeekehia ọznohia aka sa?

2

Okne ọznohia wam

¹ Kam kpayarụ, a jigidne ezi ọka wam a nurnu aka rikne, ọ zị be vume aị lele kpa mini noovume ọgbo. ² Ọ bụru nụ ikwu-onu ele enine izi kwuru gwuzosiri rikne, kpakara mmehie nụ risi rikne naharu ọgwo ọru awhnụwhnu kwesiri be, ³ ndaa kpa a jaagbanahoru, ọ bụru nụ a lewhuru okne ọznohia hna kpa anya? Ọ bụ ke Nyenwe aị n'iwhuru a beru ọsno zni, ele nurnu a kannụ aị nụ ọ bụ ezi ọka. ⁴ Chiokike gbannụ be akebbe hite nụ ọru elekema zị ichne ichne ke rikne, nụ ọru ndu-ehni, nụ ọru rikne zị ichne ichne. Ọ gba masiri akebbe nga o nyernu ele badnụ nkesi ke Enine Nso lele kpa ọ masiri a.

Jizosi nụ lele rumu nne a

⁵ Berere kwno, Chiokike bítage ele enine izi ele jaachi ọwa ke jaava, bu ọwa ke a nookwu ọka a. ⁶ Kọvu be kwuru n'otu hnenum n'ọkwukwo nsọ,

“Kini bu nhne badnu etekne bu, ke i naari ọriri gbasiri a, nu nnwo ke badnu ke i neelekota a?”

⁷ I mernu a o hietu eli matị karu ele enine izi.

I jiri igwugwu nu ọson'anya kpusi a nu risi lele okpu-eze.

⁸ I mernu a nye risi kpakara nhne.”

Ka neegesi nu o za nhne o sigbasiri o bita nu mkpururu ọchi a. Kọvu kịtna, a whnúge nu kpakara nhne ka zi nu mkpururu ọchi a. ⁹ Kọvu a whnurnu Jizosi, nye o mernu hietu eli matị karu ele enine izi. O jiri igwugwu nu ọson'anya kpusi a nu risi lele okpu-eze kwnornu nu o nwurnu ẹnwu. Hite n'oru Chiokike, o raturu ẹnwu riro kwnornu kpakara badnu.

¹⁰ Chiokike nwe kpakara nhne, ya ke masiri kpakara nhne hite n'iknema a. O mernu nhne kwesiri nga o mernu Jizosi zu ozu hite n'awnuwhnu, ma o znohia agida rumu Chiokike, mee be snornu a kehia igwe n'igwugwu a.

¹¹ Kwnornu nu nye bitaru be nsọ nu ele be bitaru nsọ bu otu ọro. Kam kpayaru, o sukwu be rumu nda a za nootu a iwhnerne. ¹² O karu,

“M jookwupiya rewhna i n'esilawuru rumu nda m, m jaaznarni i n'esilawuru ọgbako Chiokike.”

¹³ Berere kwno,

“M jootukwasi a ovu,”

o kwu kwno,

“Le me nu rumu Chiokike nyernu m.”

¹⁴ Lele rumu o sukwuru vugwu anọ-ehni nu ọvnarna, Jizosi ghoru badnu ke vugwu anọ-ehni nu ọvnarna ke nwernu rikne nwu ẹnwu, ma hite n'ẹnwu a, o megbu nye wam bu Ekwensu ke nwernu rikne ẹnwu, ¹⁵ ma o dohia ele zi n'ohi kpakara budnu be n'ogwnu ẹnwu. ¹⁶ Kwnornu

n'ezi, Jizọsi váge o yinu ele enine izi aka, kọvu rọmu avnurunu Ebereham. ¹⁷ Kam kpayaru, ọ zị mkpa Jizọsi nụ lele rọmu nda a nụ apna ọbula, ma ọ bụru nye risi ariọhna ke nwernu mkpọma obirizi kwesiri ọkwnata ovu nụ ruwhnu Chiokike, ọ bụru masị nye mernu badnụ nụ Chiokike ziri n'udno hite nụ ọgbaru mmehie. ¹⁸ Kwnornu nụ o taru awhnwhnu nga be rnarnu a ọrnurna, o nwernu rikne yisinu ele be naarna ọrnurna aka.

3

Jizọsi kakwo Mozizi

¹ Kam kpayaru, rọmu nda m, ele zị nsọ, ele vu osukwu ikwu oligwe, anụ rị ọriri nhne gbasiri Jizọsi, nye izi, nụ nye risi ariọhna ke ọkwnata ovu aị. ² Ọ bụ nye kwesiri ọkwnata ovu nyee nye hohiaru a, lele kpa Mozizi buri nye be tukurwasiri ovu nụ kpakara ọrnuru a n'oro Chiokike. ³ Jizọsi kwesiri o nwe igwugwu ke kakwo igwugwu Mozizi lele kpa nye wuru ọro nwernu igwugwu karu ọro o wuru. ⁴ Kwnornu nụ kpakara ọro nwernu nye wuru a, kọvu Chiokike wuru kpakara nhne. ⁵ Mozizi, lele nnwọ izi be kwesiri ọ tukurwasi ovu nụ kpakara ọro a, gbaru akebne nhne be jookwu nụ ruwhnu. ⁶ Kọvu Karaisi kwesiri ọkwnata ovu lele nnwọ n'oro Nda a. A bụ ọro a, ọ bụru a bita mkpọma siri rikne aị, gwuzosi masị rikne nụ nhne a neele anya a.

Ozukwa inwe ke rọmu

Chiokike

⁷ Lele kpa Enine Nsọ karu,
 “Tna, ọ bụru nụ anụ nurunu nkoli a,
⁸ anụ mee ovu anụ si rikne,
 lele kpa ele Izireli mernu nga be gwuzogidnenu Chiokike,
 ige ọrnurna n'eli-ikpa.
⁹ Nga ele nda anụ ọknani kparu m iru, kpahia m,

be whnurnu ɛrnu m nri awha ɛno.

¹⁰ Ovu weru m ɛhni kwnornu ebiri kam,
m kaa, ‘Mkpoma be noowhu apna,
be kwége ọ bíta iwu m.’

¹¹ Kam kpayaru, m ji m ovu owe ɛhni dụ risi, kaa,
‘Be jáabna hne me jeenye be ozukwa inwe.’ ”

¹² Rumu nda m, anya dụ anụ ẹli, ọ zá nye ọbula
n'esilawuru anụ ke jeenwe ovu mmehie ke kwé ekwe ke
jeeme a ọ whoga nụ hne Chiokike ke zị budnu zị. ¹³ Kọvu
anụ kwnagidne ibne anụ hnebuko ọbochi be kwuru “Tna.”
Ọ zá nye kwe aghigho ke mmehie mee ovu a si rikne
megidne Chiokike. ¹⁴ Kwnornu nụ ọ buru a jidne ọkwnata
mkpoma a nwernu nụ mbom dụ okwukwo, aị nụ Karaịsi
jeekeko nhne. ¹⁵ Lele kpa be gbarụ n'okwukwo nsọ,
“Tna, ọ bu nụ anụ nurnu nkoli a,
anụ méko ovu anụ si rikne
lele kpa ele Izireli mernu nga be gwuzogidnernu
Chiokike.”

¹⁶ Ndaa ele nurnu nkoli Chiokike mee risi rikne? Ọ búo
ele Mozizi hiri n'ẹli Ijipiti duhia sa? ¹⁷ Ndaa ele Chiokike
wesanu ovu ɛhni nri awha ɛno? Ọ búo ele mehieru, bu ele
iznu be dnarnu n'ẹli-ikpa? ¹⁸ Ndaa ele Chiokike dụru risi
nụ be jáabna nụ hne o jeenye be ozukwa inwe? Ọ búo ele
bnóge nsni? ¹⁹ A whnurnu nụ be bnáge hne o jeenye be
ozukwa inwe kwnornu nụ ókwe ekwe be.

4

¹ Chiokike kweru aị mkwna ọ bna n'ozukwa inwe a,
mkwna wam noogwuzo kwem, anụ ngwa ma a tụ ogwnu,
ọ zị otu nyenum n'esilawuru anụ ba adna nụ ọ bna nụ rime
a. ² Kwnornu nụ be znirni aị izi oma lele kpa be znirni be.
Kọvu izi be znirni be bnágene be nụ nhne, kwnornu nụ ele
nurnu a jíle ọkwnata ovu naahoru a. ³ Kịtna aị ele kweru
bnarnu n'ozukwa inwe a lele kpa Chiokike kwuru,

“M ji m ovu owe ẹhni dụ risi,
be jáabna hne me jeenye be ozukwa inwe.”

O kwuru ka, ọ bụ n'ezị nụ ẹrnu wam kwolem kpa ọ tųru ntų-ẹli ọwa. ⁴ O kwuru ọka gbasiri ọbochi ke ẹsau n'otu hnanum, “Chiokike zukwaru inwe n'ọbochi ke ẹsau nụ kpakara ẹrnu a.” ⁵ Nụ hnam kwno, ọ kaa, “Be jáabna n'ozukwa inwe m.”

⁶ A whnurnu nụ ozukwa inwe zinu ele ke Chiokike. Kọvu, ele nurnu izi ọma wam nụ mbom bnáge n'ozukwa inwe wam kwnornu n'ókwe ekwe be. ⁷ Chiokike bitaru ọbochi berere ele badnụ ji naabna n'ozukwa inwe a, kwu a “Tna.” Nga agịda awha whemernu, o hi n'ọnu Devidi kwu lele kpa o kwuru nụ mbom, “Tna, ọ bųru nụ anụ nurnu nkọli a, anụ mée ovu anụ si rikne.”

⁸ Kwnornu nụ ọ bųru nụ Josua duru be bna n'ozukwa inwe, Chiokike bó kwule ọka gbasiri ọbochi ozukwa inwe berere. ⁹ Ka neegesi nụ ozukwa inwe berere zinu rumu Chiokike lele kpa Chiokike zukwaru inwe kpa o kekworu ọwa n'ọbochi ke ẹsau. ¹⁰ Nye ọbula ke bnarnụ n'ozukwa inwe ke Chiokike, noozukwa inwe nụ kpakara ẹrnu a lele kpa Chiokike zukwaru inwe n'ẹrnu a. ¹¹ A yisi ẹhni ma a bnazne n'ozukwa inwe a, ọ zị nye ọbula ba adna kwnornu nụ ókwe ekwe lele kpa rumu Izireli dnarnụ.

¹² Ikwu-ọnu Chiokike zị budnu nọornusi ẹrnu rikne. Ọ zị bụko kakwo ama-ogwnu ruwhnu lawuru. Ọ nọodubna, neekewa mkpuru ovu nụ enine, ma ọkpukpu nụ omio. Ọ nọotupiya echiche ovu nụ agwa ke badnụ. ¹³ Ọ zá nhne be keru eke ke tugwaru otugwa n'anya Chiokike, kpakara nhne gbe anya n'anya nye wam a jaasa ajiji gbasiri ẹhni aị.

Jizọsi bụ nye risi arịohna

¹⁴ Hne a nwernu nye risi arịohna hna ezi kpa, nye beru ọsno zne nụ ruwhnu Chiokike n'oligwe, Jizọsi Karaịsi

Nnwọ Chiokike, a jidnesi okwuhia ke ọtukwasi ovu aị aka rikne. ¹⁵ Kwnornu nụ a nwée nye risi ariohna ke nhne gbasiri aị zá neemetu n'ovu, kovu a nwernu nye risi ariohna nye be kparu iru n'apna obula lele aị, kovu o méne mmehie. ¹⁶ Ngwa ma a gweru ovu siri rikne vadu ngadna oru ke Chiokike ma a nahia obirizi nụ oru jeeyinu aị aka n'ige mkpa.

5

¹ Nye risi ariohna obula bu nye be hohiaru n'esilawuru ele badnu, be bita a ichne ma o dnasni anya badnu nu ruwhnu Chiokike, naakwanu be ariohna nu nkesi kwnornu mmehie. ² O nwernu rikne gweru ovu oma mesno ele nwée rikne nu ele máa nhne n'apna obula, kwnornu nu ya n'iwuhuru a zá rikne. ³ Kam kpayaru, o naakwa ariohna kwnornu mmehie ke a, nu ke ele berere. ⁴ O zá nye gweru igwugwu o chni ehni a nye risi ariohna, kovu nye Chiokike sukuru lele kpa o sukuru Eroni. ⁵ Kpam masi, Karaisi nyége ehni a igwugwu ke nye risi ariohna. Kovu Chiokike kwuru nhne gbasiri a,

“Ji bu Nnwọ m,
M gholam Nda i tna.”

⁶ Chiokike kwu kwono nu hne berere,
“I bu nye ariohna okwnukokwnu,
n'ahiri ke Məkizedeki.”

⁷ Nga Karaisi zi budnu n'owa, o ji okne ekwna nu anya-mini rio aririo a n'okpukpe nyee Chiokike, bu nye nwernu rikne o dohia a n'enwu. O nuru okpukpe a, kwnornu nu o gwednarnu ehni a eli. ⁸ O bu n'ezi nu Jizosi bu Nnwọ Chiokike, kovu, o muhiaru obno nsní hite n'awhnuwhnu o taru. ⁹ Nga be mernu a o ziri snam, o ghoru nye risi onohia okwnukokwnu ke kpakara ele

joobno nsñi. ¹⁰ Chiokike mernu a ọ bụru nye risi ariohna n'ahiri Mèkizedeki.

Ọdnahala aznụ

¹¹ A nwernu agida nhne a jookwu gbasiri Karaisi nye risi ariohna n'ahiri Mèkizedeki, kọvu a jóokwu a kwnornu nụ anụ jéenwe rikne ghòhia be. ¹² Kịtna, anụ kwesiri ọ bụru ele jeezni nhne, kọvu ọ zị kọriri mkpa be neezni anụ nhne mbom ke ikwu-ọnu Chiokike. Ọ bụru nụ mini-remà bụ nhne anụ zị kọriri nọonwo, ọ bụo wiri siri rikne. ¹³ Kwnornu nụ nye ọbula ke nọonwo mini-remà bụ watakiri, o nwée rikne mahija nhne ọma nụ nhne bụo ọma. ¹⁴ Wiri siri rikne bụ ke ele soru oso, bụ ele be znurnu ọ mahija nhne zị ichne nụ hne nhne ọma nụ nhne ọjo zị.

6

¹ Ngwa ma a zne ruwhnu, a sigbasi iznizni mbom ke Karaisi zne nụ ozu ozu, a zoma ọ tụ ntụ-eli ọtuhnasna nụ mmehie berere hite n'ome nhne ke neegweya ẹnwu, kweru nụ Chiokike. ² Ka bụ iznizni ke ọwu mini nụ ke ọbniakwasi aka nụ risi, nụ ke ohi n'ẹnwu lizo, nụ ke ikpe zị ọkwonkokwnu. ³ Chiokike kwe, a jeeme nhne ka. ⁴ Ọ bụ nhne kwé omume nụ ele mahiaru iwhe ke Chiokike dnahnala, jeehiehna, bụ ele raturu nkesi oligwe riro, bụ ele kehjaru igwe nụ rime Enine Nso. ⁵ Ele ka bụ ke raturu nhne ọma ke ikwu-ọnu Chiokike riro ya nụ iknernema ke ọwa ke jaava, ⁶ be hi nụ ya dnahnala. Ọ bụ nhne jéekwe omume o kwuhnaya be, ọ nụ lele be nọokpogidne Nnwọ Chiokike n'olu ọgba berere, naakpasị a iwheerne nụ ruwhnu ọhna.

⁷ Ẹli ke nwornu mini ke noozokwasi a, naamipiya mkpuru ke bnannu ele ẹkwu iru, ọ nahija ngozi Chiokike. ⁸ Kọvu ẹli ke nooru igwnu nụ akikara bnáge iru ọbula. Be jọovu a ọnu, n'ipne-aznụ, bẹkwnu jeerne a.

⁹ Kọvu ele me whnurnu n'anya, ọ bụ n'ezi a nookwu kpa, a tụtwasiri ovu nụ nhne kakwo mma gbasiri anụ, bụ ngozi ke ọznohia nụ mmehie. ¹⁰ Chiokike zá neeme nhne ojo. O jéechezu ẹrnu anụ ya nụ ọwhnun'anya anụ gesiri ẹwhna a, zị kọriri neegesi hne ele ke Chiokike zị. ¹¹ A noopio ma nye ọbula mee kọriri kpam dụ okwukwo, ma olile anya anụ ziri kwem. ¹² A píole anụ bụru ele ime-mgwu, kọvu anụ nụ lele ele kweru ekwe nwe masị ndidi tem dụ ọ nahia mkwna Chiokike kweru.

Mkwana Chiokike zị kwem

¹³ Nga Chiokike kweru Ebereham mkwna, o jiri ẹhni a dụ risi kwnornu nụ ọ zá nye berere kakwo a. ¹⁴ Ọ kaa, “N'ezi ọka, m jọgozi i, nyee i ọbuba masị.” ¹⁵ Ebereham jiri ogologo nkasi ovu nwehia mkwna wam Chiokike kweru a.

¹⁶ Ele badnụ neeji nye kakwo be dụ risi, neemesi ọka be rikne, kam bụru mbimambi ọka nụ ọdogbuta. ¹⁷ Chiokike, ma o gesi ele jeekehia mkwna, nụ ọ jáagbanwo mkwna wam, jiri ẹwhna a dụ risi. ¹⁸ Chiokike nyernu aị mkwna a nụ ọ dụ risi a, nhne lawuru ka gbánwo agbanwo kwnornu nụ Chiokike jáagha aghalaghala, aị ele gbaznenu jigidne olile anya ke zị nụ ruwhnu aị aka ọ zị inwe gwụ aị. ¹⁹ A nwernu olile anya ka lele nkno ke mkpuru ovu, ke zị jii nụ kwem, ke dubnarnụ aị n'aznụ ikpe obnosni nụ rime hne zị nsọ, ²⁰ hne Jizọsi beru aị ọsno bnazne, bụru nye risi ariohna ọkwnukokwnu n'ahiri Məkizedeki.

7

Məkizedeki, nye ariohna

¹ Məkizedeki ka bụ eze Salẹm, nye ariohna ke Chiokike ke Kakwo Nhne Dum Olu. O zuteru Ebereham nga o hiri ọgwnu ke o gburu ele eze neehiehna, ọ gozi Ebereham.

² Ebereham nyee a otu nga nụ nri nga kpakara nhne o

gweyarū. Rēwhna a ke mbòm bụ “Eze Ome Mma,” ke ẹbo bụ “Eze Salẹm,” ke bụ “Eze Udno.” ³ Ọ zà ọtnutnu gbaka gbasiri nda a mọbu nne a, mọbu avnuru a, omumu a, mọbu ẹnwu a, lele Nnwọ Chiokike, ọ bụ nye ariohna ọkwnukokwnu.

⁴ Le nye kwu ka, ke nda aị Ebereham nyegarū a otu nga nū nri nga kpakara nhne ọ luhiaru n'ogwnu. ⁵ N'ezi ọka, iwu karū rumu Livai ele ariohna nahoru rumu nda be otu nga nū nri nga. Ọ bụ n'ezi nū be bụ rumu Ebereham. ⁶ Kọvu Mękizedeki híge nū avnuru Livai, kọvu ọ nahoru Ebereham otu nga nū nri nga, gọzi masi nye wam nahiaru mkwna Chiokike. ⁷ N'ezi, nye wam ke gọziri kakwo nye wam ọ gọziri. ⁸ Hna, badnū etekne ke jọnwu ọnwu nanarnū otu nga nū nri nga. Kọvu hne berere, Mękizedeki nye be gbarū akebe nū ọ jaazi tem nanarnū otu nga nū nri nga. ⁹ A jaaka nū nga Ebereham kwuru otu nga nū nri nga, nū Livai nye nanahoru otu nga nū nri nga kwuru ke a masi nū rime Ebereham, ¹⁰ kwnornu nū Livai zi nū ruwho Ebereham nda a nga Mękizedeki zuteru Ebereham.

Jizosi bụ nye ariohna
lele Mękizedeki

¹¹ Be nyernu ele Izireli iwu hite n'ele ariohna Livai. Ọ buru nū iwu ke mernu rumu Livai buru ele ariohna mernu badnū zu ozu, ọ zà mkpa nū nye ariohna berere jaava n'ahiri Mękizedeki, bụo n'ahiri Erōni. ¹² Kwnornu nū kpa be gbanwornu ele ariohna, kpam masi bụ kpa be jiri gbanwo iwu kam. ¹³ Nye a nookwu ọka bụ Nyenwe aị, nye hiri n'avnuru berere, ọ zà nye ọbula ke hiri n'avnuru kam bụ nye ọkwa ariohna. ¹⁴ A magwu nū Nyenwe aị hiri nū avnuru Juda whuya, bụ ele Mozizi kwúge nhne ọkwa ariohna gbasiri be.

¹⁵ Ka dnornu aị anya nkari nkari, kwnornu nū nye ariohna berere whuyaru lele Mękizedeki. ¹⁶ Ọ bụo nye

ariohna hite n'iwu ke osnusno ọmumu ke badnu, ọvu ọ
bụ nye ariohna hite nù iknernema budnu ke kwó okwo.

¹⁷ Kwnornu nù ọkwukwo nsọ karu kpa,
“Ị bụ nye ariohna ọkwnukokwnu,
n'ahiri Mękizedeki.”

¹⁸ Be sigbasiri iwu ọknani kwnornu nù ọ zá rikne, ọ
bnáge iru ọbula, ¹⁹ kwnornu nù ọ zá nhne ke iwu mernu
ozu ozu. Ọvu a nwernu olile anya ke ka mma ke a jeeji
vadu Chiokike ndundu. ²⁰ Chiokike duru risi gbasiri a, ele
berere buru ele ariohna hne be dúge risi. ²¹ Jizosi bụ nye
ariohna Chiokike dunnu risi, kwu masi nhne gbasiri a,
“Jihova duru risi,
ọ jáalahna aznu,

‘Ị bụ nye ariohna ọkwnukokwnu.’ ”

²² Kwnornu ọdu risi ka, Jizosi bụ mbimambi ke ọgba-
njo-ehni ke kakwo mma.

²³ Ele ariohna wam zi agida kwnornu nù be nwurnu
onwu ke mernu be nwée rikne dazigidne lele ele ariohna.

²⁴ Ọvu Jizosi zi budnu ọkwnukokwnu, ẹnu ke nye
ariohna a zá naagbanwo agbanwo. ²⁵ Kam kpayarụ, ọ
nwernu rikne ọ znọhia kpam kpam bụ ele hiri n'aka a vak-
wnusi Chiokike, kwnornu nù ọ zi budnu ọkwnukokwnu
nọorionu be aririo nù ruwhnu Chiokike.

²⁶ A nwernu nye risi ariohna nù kpa, nye zi nsọ, nwée
ntubo, nye mmehie zila nù rime, nye zi ichne hne ele
badnu ele mmehie zi, nye be gwelizoru olu kakwo kpakara
oligwe. ²⁷ Jizosi nuna lele ele risi ariohna ele berere, ọ zá
naakwa ariohna kpakara ọbochi kwnornu mmehie ke a nù
ke ele Izireli. Ọvu ọ kwarnu otu ariohna kpoi ke zuru
ohna nga o gweru ehni a kwa ariohna. ²⁸ Kwnornu nù
iwu mernu ele badnu ele zúge ozu ele risi ariohna, ọvu
ikwu-onu wam Chiokike jiri du risi ke sno iwu wam n'aznu
mernu Nnwọ wam nye zuru ozu ọkwnukokwnu.

8

Jizọsi bụ nye risi
 ọgba-njọ-ẹhni ikne

¹ Ka bụ risi kpakara nhne a nookwu, a nwernu nye risi ariohna nụ kpa, nye dazị n'akarikwnunga ngadna eze Chiokike n'oligwe. ² Nye ariohna nụ kpa zị nọornu ẹnu nye ariohna nụ Hne Kakwo Nsọ n'oligwe, bụ ezi Oro-Ẹka Nsọ ke Nyenwe aị wuru, ọ bụla badnụ. ³ Nye risi ariohna ọbula jaakwa ariohna nụ nkesi nụ ruwħnu Chiokike, ọ zị mkpa nụ nye ka jeenwerịri nhne o jeeji kwa ariohna. ⁴ Ọ bụru nụ ọ zị n'ọwa, ọ jọbu nye ariohna rịa rịa, kwnornu nụ agida ele ariohna zị ele naakwa ariohna lele kpa Iwu Mozizi kwuru. ⁵ Be neezne izi n'Oro Nsọ ke nhne atụ lele ke zị n'oligwe. Lele kpa Chiokike kannụ Mozizi nga o noowu Oro-Ẹka Nsọ, “Whnụ nụ i mernu kpakara nhne lele kpa be gesiri i be n'olu rugwu.” ⁶ Kọvu ẹnu ọkwa ariohna ke Jizọsi kakpa ke ele rnurnu ẹnu nụ mkpururu iwu ọknani. Ọgba-njọ-ẹhni ke ọ gbarụ n'esilawuru Chiokike nụ ele badnụ kakwo mma, kwnornu nụ o gwuzogwu n'olu mkwna ke kakwo mma.

⁷ Ọ bụru nụ ọgba-njọ-ẹhni ke mbom zuru ozu, mkpa ke ẹbo be znéne akpa aị. ⁸ Kọvu Chiokike whnurnu nụ ele badnụ zúge ozu, ọ kaa,

“Ọbochi wawa, bụ nhne Jihova kwuru,
 nga me nụ ọro Izireli nụ ọro Juda,
 jaagba njọ-ẹhni ikne.

⁹ Ọ jọonu lele njọ-ẹhni,
 me nụ ele nda be gbarụ,
 n'ọbochi me jiri be n'aka m
 dọhia be n'eli Ijipiti,
 be kwnátala ovu nụ njọ-ẹhni wam me nụ be gbarụ,
 m lemernu m be anya,
 bụ nhne Jihova kwuru.

¹⁰ Kịtna, ka bụ njo-ẹhni me nụ ele Izireli jaagba
nụ ọbochi ke jaava, bụ nhne Jihova kwuru.

M jeeyisi iwu m nụ rime echiche be,
m jaagbakwasị be n'olu mkpoma be,
m jọoburu Chiokike be,
be jọoburu ele ke m.

¹¹ Ọ zá nye n'esilawuru be ke jeezni ibne a,
mọbu kanu nwene a, 'Mahia Jihova,'
kwnornu nụ kpakara be jaamahia m,
hite nụ nye zi matị dụ nye ezi.

¹² M jaagbarunu be ọgahie be,
m jéechenwanya mmehie be berere.”

¹³ Hne o nookwu ọka ọgba-njo-ẹhni ikne, Chiokike
mernu ma ke mbom ziri ọknani, nhne ọbula mernu
ọknani jodoka odoka, whume masi.

9

Okpenu Chiokike n'owa

¹ Ọgba-njo-ẹhni ke mbom ke Chiokike nụ rumu Izireli
gbaru nwernu iwu osnusno okpukpe n'oro nsọ ke ọwa.

² Be wuru ọro okpukpe ke mbom ke bụ hne zi nsọ. Nụ
rime onu ọro ke mbom, nhne zi nụ rime a bụ nhne be bita
tonji nụ ikpechi nụ bredi ariohna Chiokike. ³ N'aznu ikpe
obnosni ke ẹbo bụ hne be kwu Hne Kakwo Nso. ⁴ Nhne zi
nụ rime a bụ ojo golu ke isensi, nụ Igbe Ọgba-Njo-Ẹhni be
wọru golu. Nụ rime igbe wam, nhne zi a bụ otu ite golu
mana, nụ mkpara Eroni ke waru ọkwukwo nụ mbadamba
akaworugwu lawuru ke be gbakwasiri iwu wam n'olu be.
⁵ N'olu igbe, ele enine izi be wuru ọwu zi igwugwu be kwu
Cherubim gbasaru akankwu be kpusnirni ikpechi oru. A
jéenwe rikne kowa kpa be kịtna.

⁶ Nga be bita kworu kpakara nhne, ele ariohna naabna
nụ hne zi nsọ kpakara ọbochi nornu ẹnu be. ⁷ Kọvu

okwolem nye risi ariohna naabna nū Hne Kakwo Nsọ n'aznū ikpe obnosni wam otu mgba n'awha. O jeeji ọvnarna ke o jeeji kpusni mmehie ke a nū mmehie ele Izireli mernu nū ọma ama. ⁸ Enine Nsọ neegesi kpa Ọro-Èka Nsọ ke mbom nū omen'eli a gwuzo ọriri, apna be jeeji naabna nū rime Hne Kakwo Nsọ mesnirni emesni. ⁹ Ka bụ nhne neegesi n'ige ka, nū nkesi nū ariohna be jiri kwanū Chiokike ariohna jéenwe rikne mee ele neegweya nkesi ariohna zu ozu. ¹⁰ Ka bụ wiri nū manya nū mmemem ke ọsnusna, kpakara omen'eli ele ka bụ nhne anya nọowhnu joogwuzo tem dū ige Chiokike jaagbanwo be.

Ọvnarna Karaịsi

¹¹ Kọvu Karaịsi varū lele nye risi ariohna nhne ke ka mma ke zị hna, Ọro-Èka Nsọ ke ọ nọornu ẹnū nū rime a kakpa, zu masi ozu. Ọ búo ke be jiri aka wu, ọ búo ke be keru eke n'owa ka. ¹² Nga Karaịsi bnaznenu nū rime Hne Kakwo Nsọ, ọ bnarnū otu mgba kpọi. O jíle ọvnarna owu mọbu ke nnwọ ehni kwa ariohna, kọvu o ji ọvnarna ke a gbahia kpakara aị ọkwnukokwnu. ¹³ Ọvnarna owu nū ehni nū nnwọ ehni nū rẹtnu ke be wekwasiri ele zila richna mernu be ziri richna n'olu ehni. ¹⁴ Ọ kọ buri ọvnarna Karaịsi, nye hiri n'Enine Nsọ ọkwnukokwnu gweru ehni a kwa ariohna nwée ọru nū ruwhnu Chiokike, jọosnusnama akoniche aị whoga n'ẹnū ojo ke jaakpaya ẹnū, ma a kpenu Chiokike ke zị bụdnū.

¹⁵ Kam kpayarū, Karaịsi jiri buri nye agbata ke ọgba-njọ-ehni ikne, ma ele Chiokike sukwuru nwehia mkwna o kehia nhne kwó okwo. Kwnornu nū ọ nwurnu ẹnū ma ọ zị kpa ọ gbahia be nū rime awhnūwhnu ke mmehie be mernu nū mkpururu ọgba-njọ-ehni ke mbom.

¹⁶ Hne iwu oke mkpe zị, be jeegesiri nū nye wam gbarū a nwurnu ọnwu. ¹⁷ Kwnornu nū iwu oke mkpe bụ nhne etekne hne nye gbarū a zị bụdnū, kọvu ọ jaabna

n'ernu nga nye gbarụ a nwurnu ẹnwu. ¹⁸ Ka bụ nhne kpayarụ nụ ọgba-njọ-ẹhni ke mboṃ jiri ọwusi ọvnarna gwuzosiri rikne. ¹⁹ Kwnornu nụ nga Mozizi kannụ ele Izireli kpakara nhne iwu wam kwuru, o gweru ọvnarna nnwọ ehni gwagidne a mini, gweru hisopu nụ wuulu ihie whesi n'okwukwo iwu wam nụ kpakara ele badnụ. ²⁰ Ọ kaa, “Anụ bno nsni, ka bụ ọvnarna ọgba-njọ-ẹhni ke anụ nụ Chiokike gbarụ, anụ b̄ita a.” ²¹ Kpam masi, o whesiri Ọro-Ẹka Nsọ ọvnarna nụ kpakara agbụgba nụ nhne be ji zne izi. ²² N'ezi ọka, ọ gwnarnụ matị ọvnarna mee kpakara nhne ziri snam n'iwu, kwnornu nụ hne be w̄sage ọvnarna, ọgbaru mmehie z̄la.

Ariohna Karaisi noovume mmehie

²³ Kam kpayarụ, Ọro-Ẹka Nsọ ke ọwa ka nụ kpakara nhne z̄i nụ rime a, bụ oyiyi nhne z̄i n'oligwe, bụ nhne be jeeji ọvnarna n̄osnu, k̄ovu nhne ke oligwe n'iwuhuru a pioru ariohna ke kakwo mma karụ ọvnarna an̄ohia. ²⁴ Kwnornu nụ Karaisi bn̄age nhne z̄i ns̄o be jiri aka wu, ke bụ oyiyi ke ọkwnamarna nhne. K̄ovu ọ bnazneru oligwe hne o gwuzo nụ ruwhnu Chiokike nụ risi āi. ²⁵ Nye risi ariohna ele Ju naabna Hne Kakwo Nsọ otu mgba n'awha gweru ọvnarna an̄ohia. K̄ovu Karaisi zn̄ege o ji ẹhni a kwa ariohna aḡida ige. ²⁶ Ọ buru kpam, Karaisi znernu ata awn̄uw̄hnu aḡida ige hite n'ọpanizo okike ọwa. K̄ovu ọ wh̄yaru otu mgba kp̄oi kwnornu āi n'okwukwo ige ka, gweru ẹhni a kwa ariohna ma o vume mmehie. ²⁷ Ka bụ ezi ọka, badnụ j̄onwuriri otu mgba, omekwo, ikpe Chiokike sno a. ²⁸ Kpam masi, be jiri Karaisi kwa ariohna otu mgba o vume mmehie aḡida ele badnụ, ọ jaava ke mgba law̄uru zn̄ohia ele neele anya a hne mmehie z̄la a.

10

Karaisi kwaru arìohna
zuru òhna otu mgba

¹ Iwu wam bu enine nhne oma ke jaava, o buo nhne wam, kam kpararu, o nwée rikne hite nu arìohna ke be naakwa ige obula mee ele naava o kpo risi eli zu ozu.

² O bu ru nu ele neekpenu Chiokike zi richna nu rime ovu, ikpe mmehie ba mana be. Kpakara okwa arìohna znernu okwome. ³ Kovu kpakara arìohna wam bu nhne ke neechenwanyanu be mmehie be hite n'awha du n'awha. ⁴ Kwnornu nu onnarna ehni nu owu nwée rikne vume mmehie.

⁵ Kam kpararu nga Karaisi varu n'owa, o karu,
“Arìohna nu nkesi ruwhnu oma masige i,
kovu i bitannu m ano-ehni o bonu i nsni.

⁶ Ovu za noso i n'onu
kwnornu arìohna okporne bekwnu mobu arìohna
mmehie.

⁷ M kaa, ‘Chiokike, le, m valem
o mee nhne i pioru me mee,
lele kpa be gbaru nhne gbasiri m n'okwukwo nsò.’ ”

⁸ Ke mbom, o karu, i piole arìohna nu nkesi ruwhnu oma, mobu arìohna okporne bekwnu mobu arìohna mmehie, o bu n'ezi nu iwu wam karu be mee kpa. ⁹ O kaa, “Chiokike, le, m valem o mee nhne i pioru me mee.” O gwemernu nhne ke mbom ma o zi kpa o gwuzote nhne ke ebo. ¹⁰ Kwnornu nu Jizosi Karaisi mernu nhne Chiokike pioru o mee, o snusnamarnu mmehie ai hite n'arìohna ke o jiri ehni a kwa otu mgba ke zuru ohna. ¹¹ Nye okwa arìohna obula noogwuzo kpakara obochi noornu ernu a, naakwa otu arìohna agida ige. Kovu kpakara arìohna ka nwée rikne noovume mmehie. ¹² Kovu nga nye arìohna ka kwaru arìohna ke zi okwnukokwnu kwnornu mmehie,

ọ daziri ẹli n'akarikwnunga Chiokike. ¹³ Hite n'ige wam, ọ zị neese ige Chiokike jaabita ele irno a lele nhne ọgbakwasi ọchi a. ¹⁴ Hite nụ otu ariohna, o mernu ele zị snam hite nụ mmehie zu ozu ọkwnukokwnu.

¹⁵ Enine Nso naagbanu ai akebne ka hite nụ nhne o kwuru nụ mbom,

¹⁶ “Ka bu njo-ehni ke me nụ be jaagba,
n'obochi ke jaava, bu nhne Jihova kwuru,
m jeeyisi iwu m nụ rime ovu be,
m jaagbakwasị be n'echiche be.”

¹⁷ Ọ kaa kwno berere,
“M jeechenwanya aruru-eli be,
nụ mmehie be berere.”

¹⁸ Kĩtna, ọ gbarunnu be kpakara mmehie be, ariohna berere za kwnornu mmehie. ¹⁹ Kam kpayaru, rumu nda m, a nwernu ovu siri rikne ọ bnazne nụ Hne Kakwo Nso hite n'ovnarna Jizosi. ²⁰ Ọ gbamannu ai apna ikne ke zị budnu hite n'ikpe obnosni wam ke bu ano-ehni a. ²¹ A nwernu nye risi ariohna ke kakwo, nye neelegidne oro Chiokike anya. ²² Ngwa ma a gweru mkpoma zị richna nụ ezi okwnata ovu, nụ ovu ikpe mana vakwnusi Chiokike, ya nụ ehni be jiri mini zị richna snusnama. ²³ Ngwa ma a knetasi olile anya ke okwnata ovu ai aka rikne, kwnornu nụ nye kweru ai mkwna jaabita mkwna o kweru. ²⁴ A gbalị mee nhne joovulizo owhnun'anya n'ovu ibne ai hite n'ornu ernu oma. ²⁵ A ghasa ogbako rumu nda n'otu lele kpa agwna ele badnu neeme. Kovu a kwnagidne ibne ai ke kakwo kpa obochi wam naava ndundu.

²⁶ Ọ buru nụ a jaazi koriri neeme mmehie hne a nuru ezi oka wam, ọ za ariohna berere be jaakwa kwnornu ai. ²⁷ Kovu nhne ke gwnarnu bu olile anya ke tu ogwnu ke ikpe, ya nụ ke okne bekwnu ke jeerne ele neemegidne Chiokike. ²⁸ Nye obula ke dnarnu Iwu Mozizi nwurnu

ɛnwu hne badnu lawuru mɔbu ɛto gbagidnernu a akebne, be dɔnnu a obirizi. ²⁹ Anu le kpa ikpe wam jaazi rikne bu awnɔwhnu nye wam jaata bu nye lednarnu Nnwɔ Chiokike anya, nye kpɔge ɔvnarna ɔgba-njo-ɛhni ke Chiokike nhne, ke snɔnamarnu mmehie a, nye lednarnu Enine Nso ke oru anya. ³⁰ Kwnornu nu a magwu nye karu, “Mawa nwe mmegwnahia, m jeemegwnarnu.” Jihova kwuru berere, “Jihova jeekpe ele ke a ikpe.” ³¹ O bu nhne tu ɔgwu o dnabna n'aka Chiokike ke zi budnu.

³² Anu chenwanya ɔbochi ele ke wheru ewhe kpa anu snɔrnun ovu kpa iwhne Karaisi mukwasiri anu nu rime kpakara awnɔwhnu. ³³ Agwna ige anu buru ele be kpasiri iwhnerne n'ohna, ige berere anu dasiri ele berere be neemegbu emegbu n'ikwnu. ³⁴ Anu donnu ele zi n'ikelu obirizi. Nga be nahoru anu nhne anu nwernu, ovu sɔru anu n'onu kwnornu nu anu magwu nu anu nwernu ekwnu ke jaazi okwnukokwnu n'oligwe.

³⁵ Anu tuwhu ovu osi rikne anu, o jeenwe ɔgwo ɛnu zi agida. ³⁶ Anu snuta ovu ma anu nwernu rikne mee nhne Chiokike piuru, nahia masi nhne o kweru nu mkwna.

³⁷ Kwnornu,
“Ige mati,

nye wam jaava bu nye jaava, o jooɔgbu okwnu.

³⁸ Kɔvu, nye mee mma ke m jeehi n'okwnata ovu ziri budnu,

o buru nu nye obula lahna aznu,

nhne gbasiri a joooso m ovu n'onu.”

³⁹ Kɔvu a buo ele naalahna aznu, whu etekne, a bu ele kweru du n'oznohia mkpuru ovu.

¹ Ọkwnata ovu bu ọdnabnenu nu nhne a neele anya, nu ọtukwasi ovu nu nhne ke a whnúge anya zi. ² Hite n'ọkwnata ovu, ele gbaka nahjaru ruwhnu oma n'aka Chiokike.

³ Hite n'ọkwnata ovu, a ghohiaru nu Chiokike jiri ikwu-onu a ke ọwa, ke kpayaru, nhne a noowhnu anya hi nu nhne a whnúge anya whuya.

⁴ Ebeli jiri ọkwnata ovu kwanu Chiokike ariohna ke ka ariohna Keni nwene a mma. Hite n'ọkwnata n'ovu a, Chiokike gbaru akebne nu o bu nye mee mma kwnornu nu Chiokike nahoru nkesi a. Hite n'ọkwnata n'ovu a, o zi koriri nookwu oka o bu n'ezi nu o nwurnu onwu.

⁵ Hite n'ọkwnata ovu, Inoku nwuna onwu, kovu Chiokike kwururu a nu budnu, be whnúna a, kwnornu nu Chiokike kwururu a. Kovu su Chiokike kwururu a, be gbaru akebne a nu o mernu nhne sori Chiokike ovu n'onu. ⁶ Hne ọkwnata ovu zila, be nwée rikne mee nhne joso Chiokike ovu n'onu. Kwnornu nu nye jaavakwnusi Chiokike jeekweriri nu Chiokike zi, nu o bu nye nokwu ele noopiosi a rikne ogwo ernu.

⁷ Hite n'ọkwnata ovu, Noa turu ogbo nga Chiokike doru a aka nu nsni nhne ke zi nu ruwhnu, o whnúna anya, o tu ogbo o jiri znohia ele oro a. O marnu ọwa ikpe, kehja ome mma hite n'ọkwnata ovu.

⁸ Hite n'ọkwnata ovu, Eberham bnornu nsni nga Chiokike sukwuru a zne eli ke o jeekehja nu mkwna, o whoga neezne hne o maá. ⁹ Hite n'ọkwnata ovu, o wuru n'eli Chiokike kweru a mkwna lele nye izne. O wuru n'oro-eka, ya nu Aziki nu Jekopu, ele ya nu be kehjaru otu mkwna wam. ¹⁰ Kwnornu nu Eberham neele anya eli ke nwernu ntụ-eli, ke Chiokike bu nye nka nu nye wuru a.

¹¹ Hite n'okwnata ovu, Sera nahjaru rikne o tu rime nga o wheru ige, o bu n'ezi nu o nwée nnwọ* kwnornu o karu nu o bu nye kwesiri okwnata ovu bu nye kweru mkwna. ¹² Hite n'otu badnu ka, Ebereham, o bu n'ezi o nu lele nye nwurnu onwu, hne avnurnu a hna lele mbọ ke oligwe nu lele rizza ke zi nu ngeri osimini hna ke nwée onu ogwnugwnu.

¹³ Kpakara ele ka nwurnu nu rime okwnata ovu. Be nahjage nhne Chiokike kweru mkwna, kovu be whnurnu be hite nu hne zi ikere, gweru be, kwuhja nu be bu ele izne nu ele neewhe ewhe n'owa. ¹⁴ Nga ele badnu nookwu kpa, ka neegesi nu be neele anya eli ke aka be. ¹⁵ N'ezi oka, o buru nu be naari oriri gbasiri eli ke be hiri whuya, be znernu alahna aznu. ¹⁶ Kitna, be neele anya eli ke ka mma, eli ke oligwe. Kam kpayaru, iwhnerne za neeme Chiokike ma be sukwu a Chiokike be, kwnornu nu o bitannu be otu eli.

¹⁷ Hite n'okwnata ovu, Ebereham gweru Aziki kwa arjohna nga Chiokike kparu a iru. Nye wam nahjaru mkwna wam jiri otu nnwọ kpọ o nwernu kwa arjohna. ¹⁸ O bu n'ezi nu Chiokike karu, "Hite nu Aziki, i jeenwe agida rumu." ¹⁹ Ebereham kweru nu Chiokike nwernu rikne mee Aziki hi n'enwu lizo, n'ezi oka, o nahoru nnwọ a lele nye hi n'enwu lizo.

²⁰ Hite n'okwnata ovu, Aziki goziri Jekpu nu Iso, nookwu oka gbasiri ngozi ke zi nu ruwhnu. ²¹ Hite n'okwnata ovu, Jekpu goziri rumu Josefu lawuru nga o nonwu enwu. O dnabnenu nu mkpara a kpọ risi eli nyee Chiokike.

* 11:11 mọbu hite n'okwnata ovu, Ebereham ghoru nda, o bu n'ezi o mernu okno badnu, Sera n'iwhuru a nwée nnwọ

²² Hite n'òkwnata ovu, Josefu nga ọ nọnwu ẹnwu kwuru nhne gbasiri okwnehala ke ọmu Izireli n'eli Ijipiti, nyee be iwu gbasiri ọkpukpu a.

²³ Hite n'òkwnata ovu, ele mọrnun Mozizi tugwaru a ẹnwa ẹto kwnornu nọ ọ bọ nnwọ zị ichne, ogwnu iwu eze tula be.

²⁴ Hite n'òkwnata ovu, Mozizi, nga o sopiyaru nọ badnọ, kwéle be sukwu a nnwọ adna Fero. ²⁵ O snornu ọmu Chiokike ta awnwhnu kanu a mma kakwo o nwe ovu oso n'onu ke mmehie ige matị. ²⁶ O gwnurnu nhne iwhnerne ke Karaşi nhne zị okne onu ahia kakwo kpakara ẹkwnu ke Ijipiti, kwnornu nọ o neele anya ogwo ẹnu ke zị nọ ruwhnu. ²⁷ Hite n'òkwnata ovu, ọ sigbasiri eli Ijipiti, ọ tula ogwnu ovu owe ẹhni ke eze, kwnornu nọ o gwuzoru kwem lele nye whurnu Chiokike wam be whnu anya, anya.

²⁸ Hite n'òkwnata ovu, o miteru Iriri Ogawhe nọ ọvnarna be wesaru ma enine izi ẹnwu wam ke gburu kpakara nnwọ mbom be murnu gharu o gbu nnwọ mbom ele Izireli. ²⁹ Hite n'òkwnata ovu, ọmu Izireli wheru Osimini Ihie lele eli etekne, nga ele Ijipiti pioru ma be whe, mini riri be.

³⁰ Hite n'òkwnata ovu, oghiri mkpo Jeriko dnarnu, nga ele Izireli gbaru a gburugburu ọbochi ẹsau.

³¹ Hite n'òkwnata ovu, nwerinya ewhere Rehabu ziri budnu, be gbukotala ya nọ ele irno Chiokike, kwnornu nọ o tugwaru ele zneru o nyokahia eli wam.

³² Ndaa nhne me jookwu, kwnornu nọ ige zila me jookwu nhne gbasiri Gidioni, nọ Baraki, nọ Samsini, nọ Jefita, nọ Devidi nọ Sameli, nọ kpakara ele ọwhnurninya.

³³ Ele hiri n'òkwnata ovu lugbu eli-eze, rnọ ẹnu oma, nahia mkwna, kpusni onu odum, ³⁴ kpachni ẹkwnu noonwu onwu, gbanahoru ama-ogwnu, be nwée rikne, kovu be ghoru ele dikne, ele dikne n'ogwnu, chihala ele

ogwnu ẹli berere. ³⁵ Ele rinya nahjaru ele ke be hiri n'ẹnwu lizọ. Be taru ele berere awnụwhnu, kovu be kwéle be dọhia be, ma be lizọ n'ẹnwu ke ka mma. ³⁶ Be mernu ele berere nhne rumu, pnią be hna, owe, be knernu ele berere eriri, yisi be n'ikelu.

³⁷ Be turu be akaworugwu, be kwọbiri be ẹbo, be jiri ama-ogwnu gbu be, be woru akpukpo owu nu atnuru gbaghari, be gho ele mboni, be kpakna be ẹhni, megidne be.

³⁸ Ele owa kwésile ele ka. Be gaghari lele ele nwée oro n'ẹli-ikpa nu rugwu mati, be wuru nu rime mkpewu nu onunu ẹli.

³⁹ Kpakara ele ka nwernu otnutnu oma kwnornu n'okwnata ovu be, kovu be nahjage mkwna wam. ⁴⁰ Chiokike bitannu ai nhne ka mma. Chiokike mernu ma ai nu be zukota, ma a buru ele zuru ozu n'otu.

12

Chiokike naapnią rumu a
nhne

¹ Kam kpayaru, hne a nwernu agida ele akebe gbaru ai gburugburu, a tuwhu kpakara nhne ke noobnosni ai nu mmehie ke naatakwnusi n'ẹhni ai, ma a gweru okasi mkpoma gba eso ke zi ai nu ruwhnu. ² A neelegidne Jizosi anya, nye turu ntẹ-ẹli nu nye mekwakworu okwnata ovu ai. Nye kwnornu ovu oso n'onu ke zi a nu ruwhnu li nhne igbugbu ke ogba, gweme iwhnerne, o daziri ẹli kitna n'akarikwnunga ngadna eze Chiokike. ³ Anu tule nhne gbasiri nye wam ke liri nhne igbugbu ke ogba nu omegidne ke ele mmehie, rikne bo gwu anu, anu dna n'apna. ⁴ Nu rime ogwnu anu nolu megidne mmehie, anu yoluge ogwnu du n'owusa onarna anu n'ẹnwu.

⁵ Anụ chezuru ikwu-ọnu ọkasi ovu wam ke Chiokike nookwu anụ lele rụmu,

“Nnwọ m, i lédna ọdo aka nụ nsnị ke Jihova anya,
ovu lákwadia anụ mini nga o bigbọru anụ.

⁶ Kwnornu nụ Jihova naata ele ọ whnụrnu n'anya awhnụwhnu,
naapnịa nye ọbula o kwuru nnwọ a nhne.”

⁷ Anụ nabnarnụ awhnụwhnu anụ naata lele ọdo aka nụ nsnị ke nda nọodo rụmu a. Anụ whnụlele nnwọ ke nda a zá nọodo aka nụ nsnị sa? ⁸ Ọ bụru nụ Chiokike zá nọodo anụ aka nụ nsnị lele ele berere, anụ búo rụmu a, kọvu anụ bú rụmu ọyi. ⁹ Nda aị k'ọwa nọodo aị aka nụ nsnị, a noobnonu be nsnị. A kwesiri o bnonu Nda aị ke enine aị nsnị karukwo ma a ziri bụdnu. ¹⁰ Nda aị k'ọwa naapnịa aị nhne ige matị n'ovu ọso n'ọnu be, kọvu Chiokike naapnịa aị nhne kwnornu mbnarna ke aị, ma a snornu a kehịa ọzi nsọ a. ¹¹ Ọ zá ọdo aka nụ nsnị ọbula ke nọoso ọso n'ige wam, kọvu ọ zị igbugbu. Omekwo, ọ mịpiya ezi mkpuru ke ome mma nụ udno nụ rime ele gawheru nụ rime a.

¹² Kam kpayarụ, anụ mee aka ke dnarnụ adna lizọ nụ mkpnerne ọchi ke nwée rikne gwuzoru kwem. ¹³ Anụ zne izne n'apna ke snirni asnị ọ zị ele nwée ọchi ba dna n'apna, tnụnuma, be gwọ be.

Ọ dọ aka nụ nsnị

¹⁴ Gbalị ma jị nụ kpakara ele badnụ ziri n'udno, ziri masị nsọ, kwnornu nụ ọ zá nye jọowhnu Chiokike anya sụ ọ zịla nsọ. ¹⁵ Anụ whnụ nụ ọ zá nye dnahalaru n'oru ke Chiokike. Ọ zị nye nụ lele egwnugwnu luga nlulu n'esilawuru anụ ke joovuyanụ anụ mkpa, hite nụ a mejọ agida badnụ. ¹⁶ Anụ whnụ nụ ọ zá nye neeme ọyi mọbu nye zá nọosonu Chiokike anya lele Iso, nye kwnornu otu mgba wiri re ọnodi ọpnarna a. ¹⁷ Anụ mahịaru, omekwo, o pioru ọ nahọru ngozi nda a, oghere zịla kwnornu nụ o

nwée rikne gbanwo nhne o mernu, ọ bụ n'ezi nụ o jiri anya-mini ẹkwna piosi ngozi wam rikne.

¹⁸ Anụ váduge nụ rugwu ke anụ jeemetu aka, lele rugwu Saina ke neerne bẹkwu, nụ ọchichiri, okne ogwnu nụ okne ruwhere, ¹⁹ nụ ọdidna ke ọkwodu nụ ọdidna nkọli ke ele nurnu a, riasno nkọli wam kwúma berere. ²⁰ Kwnornu nụ be gwúzolige iwu wam ke karu, “Ọ bụbedi anọhia vadu rugwu wam metu a aka, be gweru ara tugbu a.” ²¹ Nhne Mozizi whnurnu zị okne ogwnu, ọ kaa, “Ogwnu turu m, ẹhni nọoznu m biri biri.”

²² Kọvu anụ vaduru rugwu Zayoni, bụ Jeruselem ke oligwe, ẹli-ọhna ke Chiokike ke zị bụdnu, nụ ele enine izi, ọ zá nye nọogwnuli ọnu, ele neetne eri ọnwudna. ²³ Anụ vadulem ọgbako Chiokike ke rụmu be beru ọsno mu, ele be gbaru rẹwhna be n'oligwe, vakwnusi masi Chiokike, nye neekpe kpakara ele badnu ikpe, nụ enine ke ele ome mma zuru ozu. ²⁴ Anụ vakwnusiri Jizosi, nye ibno ke ọgba-njọ-ẹhni ikne, nụ ọvnarna ke owhesa, ke nookwu nhne ke ka mma kakwo ọvnarna Ebeli.

²⁵ Anya dụ anụ ẹli, anụ whnu nụ anụ ghárula ọ nurnu nhne nye wam nookwu. Ọ bụru nụ ikpe marnu ele wam bnóne nsni nhne nye wam zị nọodo be aka nụ nsni n'ọwa kwuru, ndaa kpa a jaagbanahoru, ọ bụru nụ a bnóne nsni nhne nye wam zị n'oligwe nọodo aị aka nụ nsni nookwu? ²⁶ Nkọli a mernu ọwa znụ biri biri n'ige wam, kọvu kịtna, o kweru mkwna kaa, “Berere kwno, m jeeme ọ búo ọwa kpọi znụ biri biri, kọvu oligwe masi.” ²⁷ “Berere kwno” neegesi nụ o jeegweme kpakara nhne nọoznu biri biri bụ nhne be keru eke, ma nhne ke zá nọoznu biri biri gwuzosi rikne.

²⁸ Hne a nanahoru ẹli-eze ke zá nọoznu biri biri, a tũnu Chiokike mmamma, kwnakwu a kpa ọ jọoso a n'ọnu, nụ ogwnu nụ ọso anya. ²⁹ Kwnornu nụ Chiokike bụ bẹkwu neerne erne.

13

Kpa be wu bụdnu
jaamasị Chiokike

¹ Anụ nọowhnu ẹhni anụ n'anya lele rụmu nda. ² Anụ chézu elekọta ele izne, kwnornu nụ agwna badnụ lekọtaru enine izi hne be máa. ³ Anụ chenwanya ele zị n'ikelu lele nụ anụ nụ be zị n'ikelu. Anụ chenwanya ele naata awhnụwhnu lele nụ anụ nụ be sno naata awhnụwhnu.

⁴ Anụ sọbisinu ọlulu nzi nụ nnwerne. Anụ méru ọkpata nzi nụ nnwerne kwnornu nụ Chiokike jeekpe ele neeme ọyi nụ ele ewhere ikpe. ⁵ Anụ kwé ọwhnun'anya iwai nẹechi mkpọma anụ, nhne anụ nwernu ji anụ rụwho, kwnornu nụ Chiokike karụ,

“M jáaghasa anụ rịa rịa,
m jáasa anụ aka rịa rịa.”

⁶ Kam kpayarụ, a ji ovu siri rikne kaa,
“Jihova bụ nye neenyinu m aka,
ogwnu zá nọtụ m nhne badnụ jeeme m.”

⁷ Anụ chenwanya ele risi anụ wheru ewhe, ele kwunnu anụ ikwu-ọnu Chiokike, kpa be wuru bụdnu be, kpa be nwurnu ẹnwu, anụ snornu ọkwnata ovu be. ⁸ Jizọsi Karaịsi zị kpa ọ zị, ekile, tna, dụ ọkwnukokwnu.

⁹ Anụ kwékwadia iznizni ikne ọbula zị ichne ichne kwnapụ anụ n'apna. Ọ ka mma mkpọma aị gwuzosi rikne n'oru Chiokike, ọ bụo nụ omen'ẹli wiri zị ichne ichne ke zá naabnanụ ele neeri a mbnarna ọbula. ¹⁰ A nwernu ojo ke ele naakwa arịohna n'Oro-Ẹka Nsọ nwée rikne ri nhne zị nụ olu a.

¹¹ Kwnornu nụ nye risi arịohna neegwebna ọvnarna anọhia be gburu lele arịohna mmehie nụ rime Hne Kakwo Nsọ, kọvu be nọokporne ọkpna anọhia wam bẹkwnu n'aznụ ẹli-ọhna. ¹² Kam kpayarụ, Jizọsi tarụ awhnụwhnu n'aznụ ẹli-ọhna ma o gweru ọvnarna a bịtá ele badnụ

nsọ. ¹³ Ngwa ma a znekwusi a n'aznụ ẹli-ọhna vuru masị iwħnerne a. ¹⁴ Kwnornu nụ a nwée ẹli-ọhna ke jaadazigidne hna, kọvu a neele anya ẹli ke naava nụ ruwhnu.

¹⁵ Ngwa ma a znarnị Chiokike ige ọbula, ma ọ buru ariohna hite nụ Jizọsi, ka bụ nhne nkesi ke hi aị n'ovu, hite n'ọnu nookwuhia nụ ọ bụ Nyenwe aị. ¹⁶ Anụ chenwanya, neeme nhne ọma ya nụ neekesi ele badnụ nhne anụ nwernu, kam bụ ariohna ke nọoso Chiokike ovu n'ọnu. ¹⁷ Anụ bno nsni, anụ bita ẹhni anụ nụ mkpururu ele risi anụ, kwnornu nụ be neelegidne anụ anya lele ele jaasa ajiji nụ ruwhnu Chiokike, ma be rnụ ẹrnu be n'ovu ọma, ọ bụo nụ ovu owe ẹhni, ke zá bnanụ anụ mbnarna ọbula.

Obekwu ikwu ipne-aznụ

¹⁸ Anụ kpenu aị okpukpe. A magwụ nụ ovu aị zị richna kwnornu nụ a pioru o mee nhne buru ọma ige ọbula. ¹⁹ M naariasno anụ kpenu m okpukpe ma m vakwnusi m anụ wara wara.

²⁰ Kịtna, Chiokike udno nye mernu Nyenwe aị Jizọsi hi n'ẹnwu lizọ, nye bụ Okne Nye Znụ Atnurnu wam, hite n'ọvnarna ọgba-njọ-ẹhni kwó okwo, ²¹ nyee anụ kpakara nhne buru ọma o mee echiche a. O gweru masị aị mee nhne masịri a, hite nụ Jizọsi Karaisi nye nwe igwugwu ọkwonkokwnu. Amim.

²² Rụmu nda m, anụ bno nsni n'ikwu-ọnu ezni ke me kwuru, kwnornu nụ ọkwukwo me gbarụ zá ogologo.

²³ Anụ mahia nụ nnwọ nda aị Timoti whuyalam n'ikelu. Ọ buru ọ va ngwa ngwa, me nụ a joosno va lekasi anụ.

²⁴ Anụ bekwu kpakara ele risi anụ nụ kpakara rụmu Chiokike. Ele Itali neebekwu anụ.

²⁵ Oru Chiokike dazinu kpakara anụ.

Tɛsitamenti Ikne n'Ọnu Ikwere New Testament in Ikwere

copyright © 2010 Wycliffe

Language: Ikwere

Translation by: Wycliffe

Ikwere – (ikw) Nigeria

The Iwerre language of Nigeria can also be spelled Ikwere and Ikwerrri. This language is spoken primarily by the Ikwere people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

Updates

eBible.org

PDF generated using Haiola and XeLaTeX on 3 Jul 2018 from source files dated 3 Jul 2018

c17ee3a1-1c7a-5c05-8e0f-5043e8228d89